



12 Julai 2012

Lelaki lari 8 km elak dicekup

Alor Gajah: Seorang lelaki dipercayai pengedar dadah berlari lapan kilometer bagi mengelak ditahan pihak berkuasa, namun penatnya tidak berbaloi apabila dia berjaya juga diberkas.

Dalam kejadian kira-kira jam 3 petang kelmarin, suspek berusia 21 tahun mulanya berada dalam sebuah kereta Proton Persona bersama seorang rakan apabila mereka dihampiri polis peronda selepas dilihat dalam keadaan mencurigakan.

Berjaya ditahan

Bagaimanapun, pemuda berkenaan terus keluar dari kereta terbabit dan melarikan diri, tetapi rakannya berusia 28 tahun berjaya ditahan. Polis yang memburu suspek kemudian memberkasnya di sebuah taman perumahan di Kelemak, dekat sini.

Ketua Polis daerah, Superintendan Umar Ali Saifuddin Shaharuddin, berkata pemeriksaan ke atas kereta itu menemui empat paket plastik lutsinar berisi dadah disyaki heroin seberat 10.23 gram, tiga paket dadah disyaki syabu seberat 0.93 gram di tepi pintu kereta pemandu.

"Kedua-dua lelaki berasal dari Rembia dan Kelemak itu dibawa ke Ibu Pejabat Polis Daerah Alor Gajah dan ditahan reman tujuh hari bagi membantu siasatan mengikut Seksyen 39A (2) dan Seksyen 12(2) Akta Dadah Berbahaya 1952," katanya.